

# Il cantun ha in problem cun nus (2)

DA LEO TUOR

Jeu hai ditg tertgau che nus seigien il cantun, aber quei ei buc aschia. Il cantun ei l'administraziun, lu regenza e cussegl. Ins storrir in tec cu ins ei giu Cuera ed i va encunter miezdi ed igl ei cussegl grond. Quei sefan ins en cu cliccas en resti da dumengias ed in toc mappa sut bratsch sballunan en trops encunter las ustrias sco da quels dallas vals ch'ei inagada ad onn el marcau. Muoth veva detg da sias uras, che sch'ins prendessi il Caspar Decurtins ord il cussegl grond, sche tschei sappien ins pacific – gie, jeu ditgel ussa buca cheu, quei ch'el ha detg. Dapi Decurtins, ch'ei staus el cussegl grond tochen 1904, vein nus giu en quei cussegl mo dus calibers sco el. In da quels: Gaudenz Canova da Domat, giurist. Siu plaid d'avertura sco president da quei cussegl encunter il faschissem, ils 18 da november 1940, ei vegnius scumandaus e publicaus pér curont'onns pli tard ella gasetta. La rehabilitaziun factica «durch Aufnahme der Rede ins offizielle Protokoll wurde 1997 vom Gr. Rat und vom Regierungsrat abgelehnt» (Historisches Lexikon der Schweiz). Canova ei aunc adina penibels per in

parlament che ha adina viu ses agens interess. Per realisar quels (el temps postreligijs numnan ins tals interess: visiuns) ha la politica grischuna dus metrels: Ses advocats e nos daners da taglia.

Il davos onn ei la politica cantunala cun ses advocats seconcentrada sin declarar nunvaleivlas gest duas iniziatives, numnadamein quella da lungatgs jasters e quella encunter la catscha d'atun. Schon il fatg che varga 10 000 votantAs sutscrivan ina iniziativa duess alamar quels che regian, ch'ei seigi da prender serius la glied, e sch'ina regenza ei encunter zatgei fuss ei meglier ch'ella informass enstagl scumandass. Losanna, nua che negins derschaders ein catschadurs, ha viu quei aschia. Ussa sto il cantun malgrad ses manevras char decider la populaziun pervia dalla catscha speciala. Cheu savess quella populaziun tgunsch haver in auter meini che nos catschadurs da cruna el cussegl grond ed el pign.

Quei pievel sa esser ualti stinaus, ha halt ses dretgs federalistics, gauda quels, francai els artechels da Glion dapi 1524/1526: fretgs dalla Refor-



maziun. Quei federalissem ei ina spina per la regenza hodierna. La finamira da quella ei dad engraviar las vischnauncas cun dar su ad ellas pli e pli fetg tut quei che cuosta, p. ex. las vias. Culs daners spargnai vegn fatg leschas, birocratisau ed empruau da centralisar. Nos canzlists communalis san ins reducir sin treis «D»: totòs che tulan en taxas. Sch'in privat remplaza ina canal da ruina ha el da dumandar lubientscha: Quel che mantegn vegn schicanus, quel che lai ir en decadenza romanti-

sau. Sch'in vischin metta ora in placat en in vitg vid sia casa dat il cantun la lubientscha cun treis paginas «Verfügung» da 10 puntgs mess si dad in advocat, con ditg ch'il placat astga pender, con grond ch'el astga esser e tgei colurs ch'el astga ver. Pli larschs ein ins culla architectura. Nos bauzeichners han saviu lavagar quasi mintga vitg cun lur fuschs.

Ina altra tactica veglia grischuna ei savunar. Fusiunar vischnauncas per exempel negin che vul auter che la regenza. Per quei funcziunan fusiuns mo cun furschar bancnotas sut il nas allas suprastonzas. Aschia ha la Lumnezia survegniu nov milliuns per fusiunar. Suentter havess tut giu da vegnir pli bienmarcau ed ins anfi pli tgunsch la glied pils uffecis. La realitad ei stada cuntraria. Fusiuns suflan si igl apparat, smasan igl interess politic, fan che la glied va buca pli a radunonzas cul resultat che negin stat pli a disposiziun per uffecis. Pertgei cura ch'ins ha vendiu sesez camonda il cantun. E tgi ha schon interess da sesidas seras en e seras ora nua ch'igl ei mo da far il negher e dar il tgau. Al supplicar dalla vischnaunca Lumnezia da reducir ils suprastonts sin tschun ha

Cuera detg na. Il principi stat sur la sauna raschun.

Enstagl da fusiunar ed aschia desinteressar la glied tucca ei da far il cuntrari: activar igl interess politic. Il mettel principal ei da tschaffar la giuventetgna per la politica. Denton ils vegls – pli fetg ch'els vargan ils 50 e pli fetg ch'els tacan vid la sutga – vulan buca dar orda maun lur posts lucratives, segir buc a giuvens e giuvnas. Avegnir e speranza ein aber tier la giuventetgna, buca tiels cnachers. Lezs e lur rigetem ei aunc adina sil nivel dils temps da Muoth e Canova.

Culs nov milliuns lumnezians e cun tschels 100 milliuns ch'il cantun satiara per constructs da fusiuns vegness ins da metter sin peis ina instituziun attractiva che preparass la giuventetgna dall'entira tiara per interess politics e mussass ad ella con fascinont che quei fuss federalissem e «res publica». Aber schi ditg sco ei vegn durrau ils daners per cementar interess persunals da pussonza enstagl dad investir els ella giuventetgna resta nies cantun sco plaz da lavur attractivs mo per quels sur tschunconta e per pensiunai.

## «A lunga vista fa quella strategia donn»

Gastro Grischun: Radunanza da delegads

DA GION NUTEGN STGIER / ANR

■ **Reelecziun onuraivla per il president Franz Sepp Caluori. El resta vinavant a la testa da l'uniun cun bunamain 1000 commembers. Qualitad saja er en l'avegnir il recept da success. Ad acta haja el mess la reintroduziun da la patenta d'ustiers.** Ier ha gi lieu a Müstair la 104avla radunanza da Gastro Grischun. Dapi trais onns president da quella federaziun chantunala è Franz Sepp Caluori e mainagestiun è Marc Tischhauser. En ses pled da bainvegni è Caluori sa mussà cuntent da la preschientscha da numerusas persunas da la politica, sco per exempel cusseglier guvernativ Jon Domenic Parolini. Tranter ils blers giasts eran er ils quatter novs candidats per la regenza grischuna Marcus Caduff, Andreas Felix, Peter Peyer e Walter Schlegel. Ils salids da l'uniun tetgala, la Gastro Suisse, èn vegnids dal directur Daniel Borner. A pled è er vegnida Gabriela Binkert, la presidenta dals ustiers da la Val Müstair e da l'uniun da mastergnanza.

### Passiun e bler cor

Caluori ha ditg en ses pled annual ch'els ustiers hajan ina bella professiun e sin la branscha da la gastronomia dastga mingin esser losch. Per esser in bun ospitant dovri dentant blera passiun, bler cor e fiu. I dovra però er la voluntad ed il curaschi per midadas. En l'avegnir hajan ustiers ed ustieras d'esser pli averts, moderns ed innovativs. Il giast pretenda oz na be ina buna alimentaziun, mabain spetga el in bel temp, aventuras e divertimento, ha menziunà il president dals ustiers grischuns.

### Uras da lavur pli attractivas

Per far las professiuns da la gastronomia pli attractivas e cunzunt per impedir che adina dapli forzas professiunalas bandunan la gastronomia e midan en in'atra



Marc Tischhauser, il mainagestiun da Gastro Grischun.

FOTO G. N. STGIER

branscha dovran la gastronomia e la hotellaria uras da lavur pli attractivas. En cuminanza cun la HTW Cuir saja Gastro Grischun londervi cun in project da chattar er per la gastronomia in model per uras da lavur pli flexiblas, ha accentuà Caluori. La digitalisaziun saja bain er per la gastronomia da fitg gronda impurtanza, dentant segir na il med universal. Ella saja in agid per la comunicaziun cun il giast e cunzunt er per simplifitgar il decurs da lavur. Il contact persunal tar ils giasts saja er oz anc adina indispensa-

bel e necessari, ha ditg il deputà e president dals ustiers grischuns. Qualitad, quai saja er oz anc adina la pli gronda valur en la gastronomia. Gist perquai chapescha el betg la strategia da pretschs bass da singulas pendicularas da noss chantun. A curta vista saja quella strategia bain in enrigitment, a lunga vista dentant fetschia quella politica da pretschs donn a l'entir turissem, ha menziunà Caluori. Per la gastronomia vala er en il futur be in pled: qualitad, e cun ina buna qualitad saja er pussaivel d'esser meglier

che la concorrenza. Quai che pertutga la reintroduziun dal curs «light» per far la patenta d'ustier na saja per in temp naging tema pli, ha ditg Caluori. El vuleva introducir danovamain il curs per far la patenta d'ustiers, il curs ch'è vegnì dismess en il Grischun il 1998.

### Duas novas suprastantas

Cun grond applaus han ils preschents reelegi Franz Sepp Caluori per in ulteriur bienni da trais onns sco president da Gastro Grischun.

Confirmads sco suprastants èn vegnids Alexander Hösli, Domat, Bruno Raselli, Le Prese e Primo Semadeni, Bever. Da nov per quel gremium han ils delegads elegi Fabia Caduff, Sursaiisa ed Annalies Biäsch, Tavau. Sa retratga sco suprastanta e quai suengter sis onns è Tamara Henderson, Tavau. La commembranza d'onur da Gastro Grischun han retschet l'anterior mainagestiun Fluregn Fravi e Georgette Dedual, ella ch'è stada 35 onns la bun'olma da l'uniun en il biro principal a Cuir.